

李忠簡公文溪存藁卷之十一

門人李春叟編

雜著

韶石說

送曲江趙廣文

韶盡善之樂也以名州嘉矣名之則昉于唐初
去舜之時如此其遠也山有異狀石耆老相傳
嘗於此九成焉故石之形肖之其說甚荒唐無
稽粵嶺秦始通南巡狩故未必至此然聖人聲



教之溥如日月所照霜露所墜粵當舜之世獨不在舜之天地中乎甚矣聖人之德感人之深且久矣後乎舜千有餘歲季札觀樂三嘆不已夫子聞遺音肉食焉而不味至于今又千有餘歲而石其思廟其依常隱然在人心舜何以得此於州之人州之人何以不能忘於舜也孰謂州之人非其遺民乎則此石特人心感觸之一機不必致疑可也教授趙君崇禋既模南海禮樂器以文丁奠且將樂于有虞氏之祠以實之

州之名好古敏以求之者也舜何人也
有爲其亦若是此當求之於金石絲竹之外趙君淑諸生而古其心必有道矣淳祐八年二月朔

諭鄉飲酒行禮者

其承之此邦愧無善狀惟於風教所關不敢後已消吉旦迎賓僕介于庠行鄉飲酒將與多士共興禮遜此蓋以古風相期待也禮云禮云豈虛文之謂揖遜升降進退周旋亦可以驗其人平日之所存禮之有儀所主者敬儀之不肅斯

焉取斯行禮之日執事者各供乃職在列者各
謹威儀頭容必直手容必恭足容必重毋惰以
羞工傍觀毋譁以亂我籩豆德音孔昭視民不
恍凡我同志敬之毋忽

諭鄉飲酒觀禮者

某講行鄉飲率由古禮俾邦人皆得寓目焉政
有望於相觀而善也動作有法容止可觀執事
者固在所謹然觀者亦當整襟正視屏氣肅容
攝以威儀共成嘉禮倘或跛倚譁笑是干大禮

以自取輕此豈真好禮之士哉觀禮者固欲觀
行禮者之敬忽而觀禮者之敬忽行禮者亦於
是而觀焉

送邵淑

肉食者得良客難尚矣象床之諫迹是而心差
傾坐之琴人高而行穢欲避正堂夫誰能當况
治獄官乎館尤難於客貧者因以貨愚者為所
賣卓然自立之人事決之心揆之理得矣彼既
無所容其欺假托焉于貨主人之公見偶與彼

之私情暗合則人競趨之矣雖身賢而奚以白
於人為累豈細哉余同年生顧君雲仕於時為
郡理狴犴事廉平聲孚於吏民三年矣而未聞
有客也一日邵君淑來訪銜袖有詩問奚自曰
顧君館舍也語叩其隱其來纒纒心敬之不專
章顧君賢究所自樹能不以一介輕取與節可
尚也他日得其位行其志操守可知行窩將出
領可無言以分一中造化心上經綸歸而求之
家有餘師

贈懷集莫貢士

不見莫君瑞應八年忽叩門訪小隱留之對荷
花細酌因談懷集產水晶石瑩明特異惜吾邑
無能攻治之者列之几案供拊玩清寒照人亦
天成竒物也余曰君亦猶是夫一日遇良工具
眼稍加琢瑳即成美器矣時有龍舟躍至水疑作小
溪君喜甚舉太白滿引淳祐十年夏五月朔

贈香山王公

先人與香山王君為莫逆交余兒時撰杖履侍

左右見其情好親密如兄弟先人下世今年
執友凋落盡獨翁一箇在扁舟遠遠入城叙契
闊余適有季弟之戚不能歎曲陪色笑而遽辭
歸使人感慨不忍別翁六十有九強健不少衰
許明年重來必不渝此盟也

贈傳神張森

建張材叔以能模寫梅菴翁名江湖間藝工也
而多從名公卿游氣象猶士也非若世之庸手
但能看人顏面弄粉墨探理義之精微豈不有

得於公之心也哉余曩使建將繪公像問孰能
之者皆首稱材叔禮致之果竒筆也別十餘年
忽來訪山居技益老老益窮南北數千餘逐食
役役無寧歲蜀僧之齋傳神得妙柳仲塗謂其
至藝天與纖無差忒寫太宗龍顏天為之笑寵
榮冠一時品題連篇不止一仲塗而材叔至今
不遇何耶遇不遇有命焉歸尋舊隱集西山數
老宿褒字遺子孫足以不朽孰謂材叔不遇哉
淳祐十年端午日

送相士朱杞

士大夫贈相者之言多譽喜其美已也相者對
士大夫之言多佞望其利已也彼此交相悅遂
無是非之心俗之不古類如此或薦談相朱翁
杞來曰此以具眼得品題於諸老者袖出復齋
西山遺墨而信意其見必真守必固試歷指坐
客使鑒別則多臧而少否乃心果無所利果無
所隱乎忽以將東歸告不贈之觀而言之乞褒
字之為惠不費吾何靳悞同乎流俗而不自拔

也故不敢

祭文

祭許象州文

維淳祐 年歲次庚戌二月 朔越 日門
人朝散大夫李其謹以清酌告于近故判府朝
議鈍齋許公先生鈍齋之學本源一誠文最近
古誠之著形政先及物誠之流行問無不知惟
誠故精事至能應惟誠故明誠則無欲水蘂白
清誠則無營軒冕甚輕師道自任南海橫經曾

入範模一一王成士德之深共祠之費至今朔
望羅拜于庭絃歌東莞課試始程亦崇厥祠書
閣崢嶸菊坡西山皆極口稱才可經綸位不公
卿既踰七袞乃僅雙旌輟俸廩士食續貢英藻
飾泮宮百廢並興米入斛減鹽出衡增寧指公
家以寬遠氓曾未期月洋乎政聲老不廢卷細
書如蠅斯文之厄泰山俄傾志未盡伸用未及
宏夫人惜嗟而况諸生某少撰杖屨早蒙旦評
誨猶藥石愛猶父兄猶記屢旃薦公姓名年貌
幾何清問親聆未幾去國竟負師承靈輻夾東
酌洒涕凝返築未能何敢不銘尚享

祭鍾子鴻文

維年月日朝散大夫直秘閣李某敬奠于故友
堂長秘校子鴻之靈潮號士區君名最早昂藏
標度磊隗曾抱天文地理瞿曇莊老博識其書
妙處精到桂湘閩浙江淮蜀道名山古迹窮極
幽討文窺先秦詩軋郊島長章鉅篇奮筆一掃
小奚蹇驢輕裘短帽掀髯揮塵廣座傾倒所至

交其疑作豪傑諸老愛如至寶鉗粟屢空充然養
浩斗酒孤酌絲桐一操不屑意於科舉趣林泉
而高蹈樂窩之叟茹芝之皓喜方外之散侶對
王公而睨傲達觀大方齊物自號希年少一素
無病惱臥纔數日遽以訃告幸有諸郎收拾遺
藁其三十年間情篤交好日從吾游研索理奧
益者亡矣可勝悲悼寸心惘惘一奠草草尚享
墓誌銘

林隱君墓誌銘

晉之以卓行名不必皆仕者也懿于一念竒于
一節太史氏筆之則聞滅沒無傳亦多矣南海
林君鄉山稱好人焉聞其名端甫其字訥然言
類然貌而所存踰人遠甚不心乎利名不色乎
喜怒不耳乎人之過屋闌闔中惡其囂闕隙地
於後窠花盆荷觀魚狎鶴寄意塵表或窮年不
出戶妖卒譟城下官委之登陴執戈為里閭先
時窶民窘食指困以給有述前古吉凶人明驗
可為世勸戒者君模本散布費不貲不靳已樂

善且欲夫人皆為善已不敢為惡且欲夫人皆
不為惡用心類如此安然一生七十有一歲而
終將以寶祐七年八月甲申窆之于番禺縣我
官山子一人名洪娶余女第者拜且泣以銘請
可書于其人不予其姻曰

秉彝之真古之遺民茂其後昆此為種德之根

學士林君墓誌銘

君諱植字建之譜系古汴名閥也國朝南渡初
乃先世著作郎佐郎俛始徙其族淳光絕復規

遂定居于閩之長溪厥後簪纓代不乏人

知家汴時迨君之曾太父坦隨季父宦遊南海
遂之番禺家焉坦生君之王父清臣清臣生君
之皇考申早聲場屋為庠序冠冕儷于扶風氏
生君甫髫鬣夙穎悟暨長娛色養必愉必婉以
至于失怙恃哀瘠終喪無嘉容日終其身濡露
履霜之思弗少替噫孝已夫孝為百行原宜乎
君之行著於鄉咸曰義人也同胞五人有鶴原
急難君屢蹈死弗顧親黨里閔有窶不自賑者

有及期不能婚嫁者君罄所蓄賑之茲皆厚於
事親故推其餘以往所薄者厚也亦宜使假君
以年則強為善當益充惜也其數七七而止寶
祐甲寅正月初五日歿于正寢易筭之際作數
詩偈皆蛻生死語悲夫君室隴西氏子元申弱
冠嗜績文婚于玉牒時濬之女女二人長適予
之長孫身寶次將筭戊午七月辛酉龜筮襲吉
其孤泣血托楫窶于郡之永泰里虎欄之原祔
先塋也余識其丘隴銘曰

君義人孝天性世茂閱喜余慶宅大宵閱魂永
櫛拱兮後昆盛

中大夫行起居行尚書吏部侍左侍郎兼國
史翰林編脩官寶錄院檢討官番禺縣開國
男食邑三百戶李昉英撰

右官函舊本不錄成化庚寅得於裏水林
巖先祖學士舊碑謹錄以附本文之下

六世孫禎識

行狀

崔清獻公行狀

崔與之字正子增城人家貧力學自奮先廣士有當試成均者率憚遠不行公毅然勇往既中選朝夕肄業足跡未嘗至廛市禮部奏名廷策極言宮闈皆人所難言擢乙科廣人由胄監取第者自公始歷潯州司法淮西檢法官皆有守法持正之譽汝秩宰建昌新城素號難治公始至歲適大歉民有強發廩者公折其手足以徇因請自劾守大異之開禧用兵軍需苛急公悉

以縣帑收市一毫不取於民和糴令下公依特直躬自交受民自槩不擾而辦為諸邑最趙清使希憚令諸邑視以為法且特薦于朝他司相繼論薦時相欲留中公不就通判邕州薦者咸以為訝勉公使留公不可諸公申其請有旨與在內陞擢差遣公抗章控避乞俟滿而後受從之邕守武人惟苛刻御禁卒無狀相率為亂公時攝賓陽聞變亟歸叛者將擁門拒之公疾馳以入執首亂者戮之縱其徒不問闔郡帖然擢

守賓陽提點廣西刑獄甫廷臺徧歷所部二十
五州大率皆荒寂之地朱崖隔在海外異時未
嘗識使者威儀公至父老駭異諸郡縣供帳之
類一切不受兵吏不給券犒緡錢自隨計日給
之停車決遣無頃刻暇獎廉劾貪多所刺舉風
采震動召除金部屬金虜南奔邊聲震恐淮東
密邇故汴朝廷謀將帥難其人除公直寶謨閣
知揚州安撫淮東公言邊釁已開相持六十
九所措置大抵虛文從事宜擇守將集民兵以固

基業

一作根本

除公工部侍郎尋加煥章閣待制知成

都府本路安撫使公言實邊斯可安邊益州為
四路心腹惟恃錢穀厚於他郡軍興帑庾告匱
宜厚儲積以壯邊陲拜疏即行初安丙檄西夏
夾攻金虜不克虜乘勝數盜邊蜀大擾丙薨公
便宜度劍以鎮關表除公制置使盡護西蜀之
師西北二國合從攻鳳翔叩鳳州借糧於我公
條畫事宜密授諸將隨宜酬答騰榜諭陝西五
路遺黎俾築塢自固倚我軍為聲援建言成都

灘瀨險遠艱於漕運立運米常格奏行之自是
兵皆足食蜀賴以全五年丐歸除禮部尚書公
輕舟出峽徑歸五羊自是不復出矣築室所居
之西偏扁菊坡刻韓魏公老圃秋容淡寒花晚
節香之句於門塾蓋雅志也公之門無雜賓連
帥部使者時候其門歲僅一再見未嘗一問外
事端平乙未二月摧鋒叛兵自惠陽擁衆扣州
城郡守曾治鳳宵遁官吏群造里第請公登城
公肩輿至開諭禍福又遣門人李昂英揚汪寧

縋城親諭之其徒俯伏聽命咸欲釋甲以歸而
嘗謀者黠甚以嘗害博羅令懼不免相率遁去
入據古端州以自固俄有旨依舊端明殿學士
廣東經畧安撫使兼知廣州公即家治事區處
條畫揣摩調度動中事機召兵四集賊一戰不
支聚其衆於苦竹嶺窮蹙乞降公命分隸降卒
於諸軍而戮其桀黠者俄拜叅知政事八辭不
受踰年拜右丞相上遣中使促召命守帥彭鉉
勸請又命郎官李昂英嚙命而至遜辭凡十三

疏上知公志不可回詔即家條上時政公手疏
數萬言上皆欣納家藏御札七通有文集若干
卷其文明白謹嚴家大酉書其端曰東海北海
天下老亦有盍歸西伯時白麻不能起南海千
載一人非公誰公善知人平生薦引惟游侶洪
咨夔林畧魏了翁李惟傳程公許後皆為公輔
一作顯官公嘗度劔閣留題詞蒲澗清泉白石怪我舊
盟寒里人采其語立公生祠於其地及薨贈太
師謚清獻初公持節廣右見於施行者維揚倅

高惟月銀梓曰崔公嶺海便民榜珠崖之人又
編次其罷行擾民之政曰崔公海外澄清錄在
蜀人繪公像於仙遊閣與張忠定詠趙清獻并
並祠號為三賢淳祐甲辰廣帥方大棕祠公與
張文獻九齡于學號為二獻

石公所作清獻崔公行狀蓋公嘗游崔公之
門必有是作而本集缺錄者以是集嘗遭回
祿故也是作出邵邑舊志今載崔公言行錄
正德十四年二月朔十世孫達元百拜編錄

贊銘

淨慈釋刺血寫經贊

淨屠覺新在淨慈針血書楞嚴圓覺法華華嚴
經兩年而後成錢塘劉植捐金植藏而甌之文
溪居士李某為一轉語

此經如筏寫之着相而刺血寫妄中之妄經諸
佛說血父母生何淨何垢等為前塵末法闍梨
沉酣入骨一毫且靳而況於血血猶可舍是知
身幻火痛一回直須臂斷

三十五代張天師贊

冷面皎霜凝電光雙目崢生來元自別不但父
書靈

鍾離仙贊

衣兮木葉髯戟面鐵所執何書願聞其說

呂洞賓贊

碧其風巾皓其雲袍六合飛遨仙中之豪

維摩贊

丈室着不得文殊衆香國裏薰教臭無端詐病

却成喑只為從前多業口

舊書頭批云文溪真跡犬室作室中裏作

上多業
作業多

自贊

於嶼山癯搭颯野服煮茗松根煨芋品曲且農
且漁非仙非俗其傍何有秋鶴霜竹

廣州天慶觀衆妙堂東坡井泉銘

万石史取定林寺鑲片欄護之

老經云坡記成名非古堂遂輕兩翁像久晦冥
偉方公舊貫仍取彼欄護此泓新作蓋環以銘

遺千年飲清泠續波誰李昂英

題石室木

似屈纒伸蛇解蟄似斷還連龍蛻骨天河失却
古槎檠落在人間撐突兀若非胷中磊隤灑澆
出老死畫工無此筆

題東坡竹

葉葉枝枝各標致密密疎疎總風味筆為化工
壁為地刻頃種成此君子雖然月影水影寫真
似安得千年尚生意

疏

從學者題名疏

李子先經義知名湖海間尤長於論策訓經生
固其木色賦友欲師其後場之文無不可者先
疏來學者姓名豈若世之有求於人者哉蓋欲
知其為如何人耳

衆建蓮社堂求疏語

遠公鼻孔着蓮香引得喃喃關幾場供佛建庵
人更錯老胡元不在西方

行者了寬等題錢買度牒疏

已辦僧心未圓僧相纔得方兄便成和尚

又

作佛何曾要裹纏頂門尚欠世間錢舍身者
舍佛者選佛場中化有緣

又

作佛本無相為僧却要錢豈無人割捨為結
因緣

又

即心是佛見性成僧無柰世緣要二尺綾

卷之十一

李忠簡公文溪存藁卷之十二

己巳四月三日沈氏校

門人李春叟編

詩

送廣帥趙平齋汝暨解印趨朝

海瀕老同年五載依宇下春風舞箬笠愛日曝
田舍喜無撞搪吏追逐歛段馬劇談許條褐得
趨公餘暇達官來三選小隊隣翁詫明公傑俊
人麟族稱大雅典刑樣諸老曾次郁醞藉西派
邈其源境物入陶寫才高事無難隻手擘泰華

依范邗村字人少集存
按正影上以朱記之
西樵岩碧霄七律二首刊
左兩供錄均卷尾

乘輅始踰嶺風采賢使者堂堂開大閫部屬肅
韓帕臺端有老蜮闖影含沙射孤忠冕旒知還
許河內借鈴齋安獨處冷淡閑僧夏例錢推不
受金貝視土苴首祠酌泉翁坐使饕俗化葭萌
細摩拊生意被原野循良渤海遂平理潁川霸
威風戢偷竊德意銷詭詐能令颶母伏默禱雨
師灑開倉散窮閭儉歲低粒價貢場宏敞拓芘
士千門履歷觀古賢牧美政公其亞讒夫真枉
了有識共唾罵君子竟何傷徽譽愈膾炙詔還
九棘班明發不俟駕傾城送津亭牽纜不忍捨
老夫前致辭再拜進離筭立朝要敢言切勿效
啞啞此行衆所望磐石鞏宗社

送荆門王廣文之官

京都士如雲一見知好修未嘗廣文飯已替肉
食謀炎門耻曳裾漫郎肯從游驚座吐倔奇倚
塵覺我羞窮邊人憚之長笑驅行舟遠烽亂夕
煙胡馬驕高秋清野空子衿叢棘荒半流此去
欲何之幕府應拔尤吾道豈空談取勝在一籌

文溪卷十二
一
獻馘早歸來平步班瀛洲

送鄭雪屋歸里

征衣點落紅君去與春同貧到歸時見吟多醉
後工不應冠尚鶚自許氣如虹急着看山眼飛
帆吸快風

送連推黃端簡赴班

別我谷之盤今誰似二難西江詩種好南斗劍
光寒千里依蓮重三年食蘖安頭班人品稱春
意暖征鞍端簡山谷之後其兄
端亮今丙戌同年也

武夷觀

閑乘石罽船又到浙江邊回向初心地飯依古
洞天成丹呼鶴舞噴酒起龍眠雨意偏留客茶
茶定宿緣

建倉解歸詩復徐意一

恨未澄清盡孤蹤已不安繆悠臣罪大感激上
恩寬鄉國三千里人心百八盤夢歸今始驗為
我謝言官

又

吏攀雙印出便覺此身輕物我忘恩怨漁樵寄
姓名笛聲黃犢背詩興白鷗盟故舊休相訝無
書到帝城

建寧解歸寄雪峯因大夢

行脚今朝又起單欣然歸去得安閑從前大夢
難忘處上白雲山望雪山

題雪峯因大夢頂相

終朝咬菜根那得許精神自笑形為贅從渠盡
不真閑雲留片影活佛化千身大夢何時覺癡

人問木人

送高禮部不妄知嚴州

從來直氣勁摩空又吐忠嘉忤九重指斥分明
人所忌去留諄復上能容清風慨慕桐江釣吳
渥新疏竹使筒熊軾一行聊復爾羽儀禁路要
夔龍

贈始興順首座

江湖三十載敗笠破袈裟老面阿羅漢全身小
釋迦定無牛犯稼不見鳥嚙花一笑西湖上相

逢且喫茶

弋陽鄭氏翠麓亭

管領寒溪揖恠峯徑穿鉅竹綠陰濃幽人去後
無猿鶴冷落亭臺濕蘚封

羅浮梁弥仙游爛柯山贈以曲筇方笠

葛陂龍竹東坡笠合伴山人到洞天柯爛想應
留斧在憑君試問石橋仙

過嚴子陵釣臺

船重祇因將利去船輕又恐為名來如今羞見

先正面夜半撐船過釣臺

勸梁青霞歸羅浮舊隱

逍遙八極片雲浮所過名山不久留依舊片雲
歸石峒從今更莫下山休

景泰寺

樹合疑山盡攀緣有路通遠鴉追夕照低鴈壓
西風瀑勢雷虛壑松聲浪半空凭欄僧指似漲
霧是城中

挽鈍齋先生許象州

家學存齋授淵源自晦庵存齋公伯祖也晦庵為名齋且為之記
魁文行海內師道重天南街來冰條一州纔刀
夢三芳名却千載俎豆拜祠龕

又

義重人誰及高風有古人已田分友子友人林

定西廣終于官妻子黎事保羈臣西顏瓊守羈廣

貧先生到已田贍之幹告身保薦顏起廢撫定黎抱負耕莘志依稀

陋巷仁丹青遺像在難寫道心真

又

丈席即之溫終身佩一言棟樑失安定山斗慘
韓門慟矣心喪重凄然手澤存江聲助悲些莫
返大夫魂

別陳霆

永福陳霆客鐵庵方公之館見謂清謹
予送公之喪至浴日亭下餞以小詩

政喜論文子遽歸扶胥之口訪韓碑吟篇佳處
南游得行李輕如始至時石友秉心終可托鐵
翁具眼遠相期勉旃辦取蘭闈捷四六供官且

放遲

南華寺五首

誦經聽得入從門壁上偷他四偈言畢竟單傳
端的處賣薪供母是心源

西方骨董南方寶留鎮曹溪幾百年自是後人
當不得有如翁者亦單傳

從前梵說墮虛空獨有壇經說不同體用圓明
皆寶相一丁不識却心通

未參五祖已開山合下全身此地安不是香

忘故里衣留孔道要人看

清者何曾飲盜泉僧盂底飯逆巢田此疑欲問
師無語風撼長松嘯半天

美廣帥趙平齋拓貢院

圍棘千間手拓開帥幢元是箇中來前峯卓卓
尖如筆正路堂堂穩踏槐自此鵠袍容萬七渾
然龍化出倫魁南州盡說明年好依舊科名得
上台 癸丑菊坡翁登科

送循倅黃必昌之官

好風佳月說龍川人喜新來別乘賢才儘優為
千里式學今有用四書全黃門祠下揮吟筆丞
相嶺頭先着鞭莫但俛眉銜紙尾忍教田里苦
顛連

白雲登閣

白雲捧擁到危巔傑閣暈飛倚半天谷響頗疑
吟木客潮回坐見變桑田幾重山隔幾重海一
日身閑一日仙真樂無如會心處林花野鳥亦
欣然

雲關觀月

山間未晚先得月料想城中見較遲海吐銀蟾
漸呈露林垂翠影早參差孤輪涵澗安禪處明
鏡當空沉籟時夜半衰翁猶獨坐清光吸盡入
詩脾

久住白雲呈鎮長老

桑下戒三宿我此尚留戀曹溪悟一宿我復無
知見鎮公房遜客所須如執券園丁曉供茹行
者時灌硯飯奴更蕩馬紙帳費香篆主人真好

事應春色無倦欲歸興未闌欲住面有靦飛錫
肯三逕亦有伊蒲饌

雨行梅關

濃嵐四合凍雲凝水墨連屏闥岨竒衝雨此行
風景別蒲山翠滴水簾垂

又

通宵雨滴急催梅枝北枝南曉盡開多謝花神
好看客隨車十里雪香來

雪封寺二首

鑿通危石張文獻勘破禪關盧祖師竒事已堪
誇北客梅花先暖亦南枝
征輿六月度梅關大地清涼樹影班行客不須
梅止渴流泉到耳冷潺潺

登峽山疾風甚雨

長風吹裂碧雲堆捲取銀河瀉下來雨攪犀潭
千尺浪煙遮龍窟一聲雷松翁偃盖岩隈立猿
女穿蘿洞裏回舊事蘭亭好拈出婆娑溪曲共
流杯

峽山詩併序

壬午仲冬逾至三日羊城進士李昂英
西游抵峽山舟距寺而維焉是夕也風
壯浪號駭聲戰激蛟騰鼉湧與舟盪摩
垂丙而不寧枕翌日既望攝衣登寺觀
其靈跡森然昭布不我誣也嗟乎是胡
為而來哉境竒物勝千態萬狀神愛而
茲來則士之假道乎是者亦必不凡矣
行將掬山之青軟水之綠與山水俱甲

天下以實地靈人傑云於是乎書

山通一水逕皇都多少英豪出此途傳我飛來
元羽翼好風吹送過天衢

峽山飛來殿

飛門鑿破漏天池呈佛高峯插翠微對岸鐘聲
猶隱耳御風簷角尚如輦二神擇地非着相雙
錫騰空向上機此境世間如更有安知古殿不
重飛

峽山全清閣

無塵明鏡太玲瓏
匣向周遭紫翠中
地有仙家雲母石
天然上界水晶宮
通宵如畫溪頭月
盛夏回秋竹罽風
萬斛客愁都盪盡
一盃聖酒畫欄東

峽山和東坡韻

雙虬挾泓玉輿入
百轉灣向無長公詩
草木今何顏此山
二百年寒偃客往還
長風駕余舟
人急開關逢迎欠
高僧喜有識面山
平生癖幽壑便合茅
三間君命何敢留
歸棹隨賜還慚愧
和光翁笑指青童鬢

同劉朔齋游白雲寺

衝暑登高人所憚
雲韓龍孟樂相從
眼窮溟海九萬里
身在蓬萊第一峯
潮長嶼低帆勢急
山迴路曲樹陰重
日斜移席臨池飲
戲掬清泉解酒容

又

勘破禪家最上關
掀髯朗笑響千山
海門正湧冰輪出
昏鼓先催玉節還
獨上層巔風浩蕩
歸

沿小澗石孱顏尋幽本是閑人事聊復分君半
日閑

靈洲

眼前無限往來舟射利干名不肯休少見人心
如此寺屹然砥柱在中流

李忠簡公文溪存藁卷之十二

李忠簡公文溪存藁卷之十三

門人李春叟編

詩

送張子元班見

笑掇巍科是管君等閑馬上換京官扶搖九萬
從今易植立千年自古難多辦衣裘禦風雪緊
操維桡過瀧灘中朝知舊如相問試把吟篇舉
似看

酌別張子元

子元已注今年班籍去臆余以言職免
歸子元不待引見毅然相隨南還茲再
入京送之至鑒空閣下用東坡韻酌別
去冬初去國逆旅等順境禍機衆危之沙壘伺
人影拂衣肯同歸荒驛燈夜永幸脫妖墓口黑
月重磨鏡勤君再行役我愧心耿耿陛下皇明
穹賢聚織邪屏石梁盛此士豈復松廳冷甬中
貯竒策可以靖邊警平生羞駘駒看取囊露頰
堂堂曲江翁芳躅在梅嶺

又

南士如君幾妙處方寸境撐腸五千卷落筆擅
三影喜談狂朱雲恥作諛谷永憂時點鬣雪未
肯踈鑷鏡摩挲匣中龍起視斗牛耿每同畫灰
語寒夜僮僕屏吾儕期歲晏世俗任炎冷江亭
揮別酒譎笑鬪機警景文兄弟情畝異禾同穎
一邊多便驛頻書來越嶺

和廣帥宋自牧勸駕韻

天將造榜放秋晴南國新逢運會亨障礙洞開

來試者計偕穩送上華京主人况是梅花宋寓
客慚非日色程面見河南已分曉佇聆魁捷響
仙城

觀入試者

鐘撼鷄鳴萬家起月下紛紛白袍子捉壺挈榼
春遊鬧擎箱探篋誰家徙通衢隘塞行人絕露
坐欠伸奴跛倚遠聞雷譟轟應答近亦洶洶殊
聒耳軋然棘戶破曉色陣脚忽移去如蟻壯夫
先入護几案儒雅雍容行且立垂髻趨闕未知

苦戴白相持嘆衰矣自從明詔到郡國士出深
山集城市但能操筆不曳白秋榜人人都準擬
分明結社戰所兵投合主司誰得髓昨科試人
今或亡三年場屋能消幾功名分置勿言身
健邇來已堪喜槐黃早脫吾僥倖因送兒曹得
觀視傍人休笑李秀才三十年前亦如此

再用觀入試韻

涵育累朝士興起薄海絃歌爭教子簞金世守
韋一經俎豆少成孟三徙盡從科舉梯進取鶴

髮望深門日倚藝先德後已非古心術乖違徒
口耳天門髣髴馮為馬陰德却關橋度蟻時來
乳臭亦觀光潦倒英雄頻坎止棘闈投卷姑應
之桂籍題名先定矣可憐數千困眊耗僅二十
人誇利市近歲詞場尚剽拾文體腐陳難古擬
倩人者幸耘人貪氣習陋汙淪骨髓主司頭腦
易冬烘日色不迷世能幾所憂程文悞後學豈
但升沉繫悲喜他人愛子亦如我何敢庸心泰
越視願言通榜皆實才如已得之無彼此

聯樵

送李尉興龍之海豐任

書味無窮得屬厭待瓜六載不辭淹乃心雅欲
親諸老初筮惟知守一廉毋縱彎弓獵鷄犬謹
防暴客起魚鹽同鄉同姓鍾情處酌別中秋吸
玉蟾

送舶使孫叔諧東歸

尊鱸高興趁新秋帆腹吞風湧去舟萬寶集登
天子庫諸蠻遮泣海山樓世間顛倒是非夢達

者逍遙得失候歸到家林定重九團欒杯酒菊
花浮

宴鳴珮亭和趙漕韻

數尺飛泉漏隔城
寒岩坳處落琮琤
懸知勝境無塵到
却訝晴天作雨聲
一飲不容貪者飲
兩峰宜著醉翁行
此泉千載因人重
曾識光風霽月清

送三舉人

已酉鄉貢鄰曲得三士甚為之喜玉帳

鹿宴有詩已即席和二首歸而別成一
首贈三傑之行

銅蟾滴硯不曾晴
命到通時文乃亨
善射定知楊破的
力耕必獲稼如京
錦旗門巷誇聯薦
椽筆春闈又中程
擢第三人如下問
定將四字語元城

送梁上舍必得大學解試

南國去天遠行程勿滯留
試期催負笈戰勝決
焚舟澹墨題金榜
英聲起壁流
旦評期望久着

力在毫頭

用前韻送潘上舍

謙為賢業址取履卜封留筆下千鈞弩曾中萬
斛舟楫庭聞誨語米廩友名流連捷歸藍綬鄰
翁好話頭

贛學鄉飲禮成二首

風化之原出泮芹飲循儀禮豆籩陳國中推擇
爵齒德堂上獻酌賓介僕主一敬存容自肅歌
三樂備意相親粲然應接非觀美所望今人樣

主人

無譁觀者也深衣古典如迂效頗奇放出曦輪
一事日飛來捷幟序賓時俎陽便覺春流暢拜
壽潛教俗轉移此禮重行應易易邦人耳目熟
威儀

重九遊鬱孤臺和座客韻

座上多俊人哥屈角拔犀追隨飈館游鼉鳴玉
龍嘶夕陽催歸鞭更酌樽重携懷開鈎鈎簾語
合印印泥似與花神期拈出糕字題壯哉千尺

文藻卷十三
臺虎踞譙之西枰中十萬家一目城市低乘風
巾可橋取月箸可梯豪氣壓崆峒雙明照虹溪
響山慨懷古妙句吾家鷄邦人趁遨頭壺榼山
之蹊最喜秋事成千畝黃雲齊

是日至馬祖嵒和前韻

九秋天地香巔產饒木犀登高詣其顛風健戲
馬嘶偷得一日閑古錦奚奴携秋陽閣霏雨飛
蓋換障泥舉揚馬祖禪拂摩老坡題菊萸勸人
飲猛吞玉東西凭闌視九州莽蒼煙水低如何
昌黎翁華嶺須縛梯野性淡無嗜所樂惟山溪
每羞名利區得失爭蟲鷄意行契真趣荒苔踏
成蹊嘉辰且盡歡聚散或不齊

送子先賢歸南海

束書相伴到江西我尚濡留子遽歸輪角難生
催別筭刀頭欲折為斑衣功名有分須如意學
問無窮更造微若到家林遇奴輩先教拂拭釣
魚磯

寄贈竹隱李聘君

圓沙有此隱君子短褐枯筇自一丘安樂窩中
寬宇宙逍遙游處眇公侯逢人皆喜一無忤於
世何求百不憂種德已深天必報大兒玉立最
清修翁長子春叟三薦于鄉名士也清修可敬

池州溪橋

萬里長江吸一盃等閑袖劔九華來溪橋獨坐
無人識又駕長風跨鶴回

同劉朔齋游蒲澗謁菊坡祠

聽隨絲繆飯僧坊丞相祠堂一瓣香試問神仙

蒲九節何如名德菊孤芳高山仰止堪模楷百
世聞之尚激昂我輩此來深有意豈專泉石癖
膏盲

蒲澗滴水巖觀瀑

與可人游五四并快風吹面洗炎蒸鹿廵夾道
千章木猿掛垂崖百尺藤石室橫琴清振玉壺
瓢酌水冷調水瀑簾雨後籠山闊不許塵埃俗
耳聽

送鑒師住靈洲寺

少年芹泮也儒冠底事緇袍染異端孤島一燈
開佛屋長身七尺占僧單鐘鳴魚叩隨緣過棹
舞鷗飛取次看亭下聽經黿在否石欄搖影碧
波寒

挽如老歸真

不見纔三日喧傳已坐亡平生功行到垂絕偈
言香緣分無高刹禪名却四方開包殘藁在切
勿放毫光

迎廣帥徐意一大參五首

桂林舊着綉衣來久矣餘波拍越臺自古直臣
多牧廣廣平曾賦嶺頭梅

曉來竹馬躍兒曹次第牙幢壓近郊五老跨羊
持色穗也應歡喜候前茅

別去丹山劃七春一塵今日是滕民擬撐釣舸
迎前路猿鶴從傍冷笑人

魚稻之鄉鴈鶩驕鯨鯢噴沫撼江湖明公自是
威風手南土應無莠害苗

杜劉二子穎川居出處雖同語嘿殊勿謂寒蟬

吾願學閉門自辦靜工夫

贈海珠湛老

也曾勘破到風幡坐得形枯鬢早斑
袖子指為真缺漢江神幻出小金山
華亭浪急翻船入葱嶺雲深挈履還
香燼未寒行道處蕭森翠竹護禪關

送廣東憲陳均

十五年間再綉衣幡然一出浩然歸
園空但欲全人命網打誰能避禍機
壬巧交攻邪害正丁

錢奏免是成非離亭父老遮如堵莫駐春江去

棹飛

丘漕陳知章抑平民為徭且就刀鋸陳公仲其在全活甚衆反為所誣遭劫而去

又

我如越雪致信信此事牽連亦到君久矣
浮名等蠻觸付之公論定猶薰四知誰不推
楊震三已何曾損子文甚欲一行陪祖帳
萬山遙隔幾重雲

黃士奇公檄送其雙親歸閩以詩送之

佳哉茂士頗圓機頻到蕭齋對塵揮
官長見知

因職業人生最樂有庭闈東山至寶身當惜伯
玉中年力去非一事說來真可敬來裝整矣貸
金歸

贈曾士倬用許廣文韻

里閑如君苦績文幾年良玉困炎岷鸚書快甚
催隨計鶴髮忻然慰倚門袍綠光華應分有汗
青久遠要名存江頭目送西行棹驚起驪龍涸
睡昏

送魁星與李子先

金斗高挑鬼狀獐世傳此像是魁星祥光閃爍
開先兆助子秋闈筆硯靈

送演姪

演姪自建來省侍寧化尉闕到將之官
作詩警之

少年政要識艱難受國恩深早一官着力莫孤
先世望從頭細把四書看金蘭益友真同志菽
水慈親曲盡懽學取老夫窮意思免教人指袴
繻紉

又

五常百行異其名
腔子源頭一箇誠
數馬似愚寧過謹
懸魚雖矯却真清
寬和愛衆衆亦愛
驕倨輕人人所輕
詩好何如勲業好
旂常元不載詩聲

又

一同休戚尉相關
肉食那容職曠
瘵驗視難真防木刻
追擒易誤戒弓彎
千尋樹看萌芽始
萬里行從跬步間
大抵窮通皆定分
炎門邪徑莫

躋攀

送梁伯隆歸丹谷舊隱

秋堂之客自建上來
省携以偕行

昔人入山訪隱君
每恨見山不見人
子持畫圖走跋跋
人雖可即山非真
自言谷中萬脩筠
泉鳴琮琤石嶙峋
誰甘泚跡麋鹿群
雅意遠遊闊見聞
飛笳遂過南海瀕
翻海一洗征衣塵
東望絕域天無垠
藥洲風月蒲澗雲
間出奇語頗自珍
奚囊十襲而三重
槿花猩血荔錦紋
何如故

園桃李春江湖社友杯十分何如族聚情話親
行路之難多酸辛還家火急埋車輪拂拭磯苔
開徑榛畹蘭籬菊庭古椿贈篇滿篋不療貧幾
人煉藥能輕身本分荷鋤驅犢西疇耘武夷山
下擊壤為堯民

司法曾子美新第榮歸欲得余詩不敢效

世俗諛語

里同清獻又聞風耿耿胸中便不同一疏叫雲
韋布日大廷對策想輸忠

又

舌似河懸筆水翻春官首疏見忠肝士須卓尔
名當世好取前脩節行看

子先宗友試蘭省送以小詩

毫端五色織成章皎皎清標月照梁再戰文場
推定霸一經書法首尊王鞭揚庾嶺梅花早梯
上寒宮桂籍香師道自居吾豈敢所期竹帛遠
流芳

北山證果寺

久聞北寺最清幽因看花田遂一游近國好山
半煙雨參天喬木幾春秋香凝永晝添談柄風
嘯長松爽茗甌此境今纔逢我輩不留詩去鶴
猿羞

送葉耆卿試太學

背城羸一戰壁水是儒林詞賦八叉手功名寸
鍊心程兼馳數驛學苦惜分陰清獻起康成長
風送捷音

表釋應端住興化寺以其說而勉之

鉢中滴水也難消切莫貪他寺富饒留取大皮
纏大樹腹圍緊緊篋三條

又

一般奇怪弄精魂循蜺皆餐針戲吞未到空通
渠地位只當齊戒作沙門

李忠簡公文溪存藁卷之十三

李忠簡公文溪存藁卷之十四

門人李春叟編

詩

羅浮國醮

昔下元日朝廷遣使賫香建醮有五雲呈瑞

霓旌蹕躑拜王宸
發揮道德五千文
步虛夜半千山月
朝斗空中五色雲
風雨若時昌國運
乾坤齊壽祝吾君
賢侯方寸精誠積
散作豐湖叶氣薰

羅浮飛雲頂

山行頗覺思悠然游遍仙家幾洞天登見日亭
風刮面立飛雲頂月齊肩稚川翁有燒丹竈景
泰師留卓錫泉我得真人金口訣無求自可享
長年

羅浮桃源峒

在山東北其峒幽邃人跡罕

靈符鎖盡穴中蛇深入千崑處士家峒戶隔雲
呼不應時時流水出桃花

戲題羅浮梁彌仙寫真

八十童顏雙眼明浪游湖海一身輕莫將啖肉

先生比箇是羅浮老樹精

羅浮何君祐夫相訪惠詩又出所作水墨
魚戲題卷末

山頭釣引千鈞魚鉄橋曾逢稚川奴風波平地
誤點額戲取墨汁翻模糊縱觀濠上契妙趣浩
浩胷次涵江湖墨雲忽從硯池起撥刺跳出形
模殊大魚騰驤撼風雨小魚瑣碎游荇蒲技如
元放幾許竒金盤一箇松江鱸試張亭前漲波
影春鋤飛下傍睢盱世間畫史少活筆描寫終

類鮒肆枯文溪一灣浮釣徒欠得龍眠為嚴瀨
羊裘圖

羅浮峒長寶谷王寧素送藥瓢

久矣深山煉鶴形聞呼峒長又逃名斷崖怪木
人稀跡亂石奔泉澗有聲劍定通神收古匣棋
聊供玩戲紋枰藥瓢解贈寧無意重到孤庵論
養生

贈雲峯演庵主

一庵移向白雲堆檜栢參天少日栽頗怪髮如

金線樣想曾眼見鐵橋來佛粘土壁煎茶供客
蒲團取芋煨却笑老盧懷鉢走只因說出鏡
共臺

題羅浮冲虛觀化緣疏

仙去千年重此山不禁風雨屋摧殘金能點化
空談易錢欠通神着力難支厦終非一木了成
裘未免衆毛攢洞天有分人人到輪奐峩峩起

筆端

寶祐乙卯峒長黎道靜住持冲虛觀求詩
化緣脩造輪奐一新

送湛師回羅浮花首山

翩然拂袖忽然回帶得羅浮面目來乞食又還
雙足蠶坐禪豈是寸心灰故依花首從三靖旋
摘茶芽供一杯蘭若苦空君不厭可能為我掃
蒼苔

秋試已近用韻勉兒輩

鄴軸輪囷數世藏乃翁曾讀被龍光詩書有種
芥拾紫科舉催人槐又黃學到自然名盛大文
工更要理深長歲當酉戌吾家旺月府先教實
桂香

送黃提幹赴班

不枉金閨貯一賢唱名重見冕旒前省闈見說
第三賦選調猶遲十八年據實語入南嶠事無
多行李浙江船壺山群彥官今緊直諒如君合
茹連

送恩平潛使君還里

風流太守作春游到處恩波浩蕩流懷綬故鄉
需上日移舟別浦趁中秋聲歌洋溢行人口書
翰縱橫健筆頭識面雖新心頗熟慇懃話別送

歸舟

又

五載南州屈重名活人一段是歸程兩州曾喚
兩蘇起孤節要師孤竹清合有鋒車催赴闕不
應畫戟又專城閑身已決深山底千里猶能共

月明

壽張新班

喜氣稜稜肖紫嵩向來石燕毓奇男九十平入

相今纔半七日為人恰後三正月十日籍濕金閨

穹地步椒香玉笋盜春酣赤松須待功名遂蒲

澗清泉墨菊潭

送次兒解試

四度牋名達帝聰國子監中者一布衣便有此

遭逢吾家積慶為心印一戰收功在筆鋒舉子

頭場關薦鴨時文手段要屠龍庭前手植森森

桂飛捷今秋好事重

肇慶倅王康應平反帥司冤獄詩紀其事

人生天地間本是同胞出貴賤與賢愚分殊而

理一上帝立君師朝廷設官職凡百有司存各
欲盡其責一或無人心何以順天則廣南十四
州官吏幾滿百公道孰扶持田野多菜色大桀
作威福小桀肆蠱賊周興而爪牙却起而賓客
君祿君忍欺天民天弗恤貪饕餮事筐筥殘忍尚
微纏可憐田舍翁駢首膏斧鑕可憐富家兒鞭
背遭黥墨怒氣劇炎火讒言易轉石恩門甘仰
面藩間爭屈膝啞啞一世人天高雲霧黑豈無
賢大夫留此一綫脉堂堂西蜀翁憤氣填骨髓

尚友周濂溪拙矣謀身策念我同胞人罹此操
戈厄苦語為平反片言天可質細閱拙錄篇事
事皆陰騭孟子謂非人由其無隱惻此翁仁者
勇姦諛誅以筆天道本昭昭彼巧竟何益吾皇
本好生折揚西列棘安得百于公落落參邦國

觀穫

負郭平田濶秋深穫課勤短鎌行缺月多稼剪
黃雲舊臘占三白今年稔十分太平村舍裏墮
穗飽鷄群

紀事保林尉韻

保昌尉陳知章權廣倅捕南海平民為
擒賊凡三十人獄將具余作劄子露香
告于天而後達于帥閫不行其言又以
公狀白于憲臺遠檄循倅潛君審之而
後獄得少緩林尉汝沆有詩用其韻云
清晨風日闕群陰一紙三熏上帝臨或者貪功
頻滑手毅然奮筆特誅心冤辭賴有由言折聖
世難施漢法沉此舉豈謀身禍福祗憐無罪繫

南音

苦秋暑引

巴西歲廣漕丘迪嘉攝帥苛虐流毒朝
廷劄趙倉汝暨兼攝帥漕其人利忍不
授印故作是詩

商金久得柄老火未退舍甌中着寰宇赫酷甚
於夏池湯頗殃魚田龜應害稼桃笙亦漿汗水
國無涼榭扇揮腕欲脫忍渴畏杯竿樹間寂秋
聲矩令何時下四序本循環寒暑相代謝炎炎

推不去誰與詰造化人思濯清泠風露願一借
再拜祈薦收西陸早命駕

聞褫閣職免新任之報

遠民寬甚草管筮抗論公庭出至誠且喜一方
全性命何妨三字減頭銜機關平地藏深窞仕
宦伶人視戲衫五遜州符今免矣幅巾藜杖可
松杉

又

狂妄孤臣罪有餘三年三度掛丹書群兒過計

愁郎羅外物浮名總子虛只是儒酸真面目不
題道號混樵漁親朋欲語澆教醉休與時人定
毀譽

送族子春叟游西廣

鳳出丹山定九苞桂林要棟一枝巢久聞崑崙
須幽討不是人豪莫汎交鶴髮頻將安問寄螢
窓勤把舊書抄功名到底還堅志崛起新豐一
草茅

後峒月溪寺

森森杉檜鬱相繆散策何妨逐勝游梵宇莊嚴
傳浙樣碧池蕩漾納泉流將軍贏得山林在袖
子多因粥飯留眼界雖云欠軒豁晚涼宜酒且
夷猶

山行

塵中事日生撥剔且山行襍被欣然出登車趣
便清奴爭携蠟屐客請帶棋枰纔過城闌外耳
根無市聲

後峒月溪寺

寺巧蟠山背池圓印寺前連筒泉落壑如鏡地
無磚茗苦苛留客僧淳懶說禪使君期不至一
宿笑無緣

是日期吳守未至

樵者

近道其樵者勞哉食束薪運斤碎盤錯荷擔下
嶙峋恐是仙王質何須貴買臣路傍迎一笑笑
我絆簪紳

李忠簡公文溪存藁卷之十四

西樵巖

巨石卷阿駕半天樵山風景豈虛傳
水簾不捲四時雨丹竈空想萬古煙
印石尚存烏利跡問誰曾識紫姑仙
我來遊遍登雲谷雲借山僧半榻眠

碧霄

未到白雲先碧霄瘦藤支我上山腰
烟橫遠樹醉時豁竹引清泉塵慮澆
酒滴松根和露飲茶烹石鼎抱茅
燒平生不被名利鎖半掩柴扉聽晚樵

李忠簡公文溪存藁卷之十五

門人李春叟編

詩

送荃翁張端義之惠陽

吹面東風豎綠簑詩翁七十醉婆娑
放懷自號天隨子知我無如春夢婆
吟有小奚磨破硯卧看赤脚踏行窩
太湖爭似黃灣濶高浪粘天獨笑過

張荃翁大湖人端平雷變上疏直言謫居
曲江往來韶廣間後又以言忤當路者謫

終焉

即席和人韻送荅翁

詩似油翁背注油知音世有幾
荆州乍寒乍暖方榆火無米無錢
只葉舟客况可堪今老大人
生何必盡封侯津亭且莫匆匆去
萬斛春醪任拍浮

白雲獅子峯望羅浮

不到羅浮瞥六年後期幾誤鐵橋仙
遠雲不隔山真面西魔元同第七天

白雲乃羅浮西魔

雲泉亭

白雲寺前新築此亭公為作銘

絕頂鬱其前寒崖噴玉泉亭成山補闕
境勝我攬先樹杪江天接榕根石磴懸
賞心遂連日合為智仙傳

送李路鈴萬入京

運厄南州暴吏專鷓冠却有
好官負捕徭怕損平人命製錦盡除常例
錢枲鑿一言辭辟郡宵襟三略合籌邊
景文匹馬長相過我愧才非玉局仙

路鈴李萬建安人立漕以梅州辟之不受

和心字韻送林尉公琰校文

鷓袍忙立老槐陰爭望文星早照臨稱物衡無
高下手別形鑑有是非心品題豈逐朱衣轉沙
汰何妨苦海沉將見賢書協輿論真才到此遇
知音

蒲澗和東坡韻

四時冰柱濕風前絕頂飛來一派泉瘦蔓相牽
根太古蒼崖特立探長天竈荒孤鶴尋遺跡寺
老幽禽闖坐禪閑日頻游歸復夢結廬曾許躡
坡僊

蒲澗山行宿景泰呈諸友人

蒲根採得汎金船滴水崑前且地仙造物添支
閑歲月上恩不與好山川意行芳草迷丹竈旋
摘新芽撥澗泉欲雨還晴便登覽更消一宿白
雲顛

四月十五游僧寺

今日快逢僧結夏不妨乘興扣禪扉山垂遠瀑
溪聲急風捲癡雲雨脚稀囊錦詩成僧借看紋
棋棋落鳥驚飛此來莫訝凭欄久傑閣新成拂

翠微

代送丘漕迪嘉

假帥如公自古無
邦人久矣望鋒車
政聲難掩諸公說
明主周知萬里餘
豹尾鷄翹那欠此
尊羹鱸膾且歸歟
江頭鼓動江船去
喜氣懽聲動里間

用人韻送梅糾梁現

征鞍風軟踏香塵
又送斯人南海濱
糾郡正資賓畫重
洗冤須放筆頭春
勉期聖處功夫到
肯

學世間兒女癩
五瘴由心今一洗
笑渠辟瘴嚼仁頻

送舶使周申

堂堂山立舊朝簪
又屈清流督獻琛
風趕連艘出獅國
浪吹殘句到鷄林
平生不隔同年面
中歲難禁惜別心
歸見耆英定相問
只言閉戶萬山深

哭清遠權宰樓海司法

樓君宰清遠
峒寇一夕入
縣治倉卒告

變君挺身出論賊竟遇害歿于兵

諭賊散私財冥頑不可回憤然瞋目罵吾已戴
頭來一死當凶刃千家免劫灰遺孤元未有行
路為悲哀

又

百里稱廉吏誰歟起釁端州符需賦急軍餉及
期難節義扶澆俗朝廷贈大官邑人崇廟像猶
似髮衝冠

送陳大雷試太學

裹糧四千里賈勇萬人場庾嶺琴書去橋門姓
字香有司應眼具喜氣已眉黃踐履宜天相時
文况所長

贈宋省元魏薦經義

宋秉孫廣帥慈之子也治周禮義

傑作傳來見一斑少年筆力老孱顏根源有學
皆堪味首尾無瑕孰敢刪工要前篇人易取說
須兩段意相關森森天骨晶光縹去必軒騰十

二閑

觀定堂

梵宮凭水建蓬荜費芟除岸破群魚出枝危獨
鶴居定鐘僧睡早揮塵客談虛月滿龕燈小風
停幡影踈供盤多佛菓僧飯飽園蔬惟有開山
老清高閑草廬

八月驟寒

秋欲中分暑更祥金風崛起便成寒桃笙夜展
猶嫌執狐向朝披便怯單翻手炎涼真可笑循
環造化果無端老來一任添霜纓寒暑難磨只

寸丹

中秋無月

已孤前度一中秋滿望今宵月下游藥杵放閑
靈兔懶鏡奩掩却素娥愁知誰有術擎梯取枉
費當年弄斧脩天靳清明每如此樽前休恨翳
雲浮

示兒用許廣文韻

斐然狂簡不知非席帽何時免諛譏官樣詞章
惟典雅心腔理義要深幾各隨鵬鷗高低適一

笑鷄蟲得失微偶未成名兒勿恨我方追悔蹈
文闡

悼花首湛長老

碧眸泓鐵面跣足衲懸鶉數日蒲團定一如泥
塑人施錢隨散擲忍辱已忘嗔丁字何曾識拈
提話轉新

又

別我笑吟吟羅浮願力深空拳糊衆口平地起
叢林山迥孤雲沒溪寒片月沉人今竒坐蛻在

日孰知音

飲赴解試士友二首

座滿挺時髦經明亦賦豪幾年勤用志三日健
揮毫笑取刀牛角相逢酒蟹螯有名還有分秋
鴉碧雲高

又

少日諳場屋斯文為細論艱深成札闥卑弱又
西崐與客為佳識當年是解元賀詩多辦取盛
事属于門

山寺夜起看月

丙夜忽窓白披衣起凭欄山川如晝見松檜照
人寒孤鶴欵屋春群僧斲紙罩燈前呼老佛妙
境許同觀

三山亭

山中招提鼎足踞路如丁字分頭入遠看港汊
紛長繩俯見阜丘纔小笠班荆坐僕縱之息爭
解綠荷撮紅粒群然飲澗忽喧噪石兀深叢疑
虎立我起胡床劃孤嘯前峯響峇松風急舉頭

雲端尚尺半搭竹板蘿進千級

和徐意一韻贈寶積中空山

道是空山却有渠元來有有亦無無若能空到
真空處萬斛塵埃着確夫

採陽軒

看盡西園十里梅黃昏寒月趁人回要圓一段
清游事更訪仙宮索茗杯

古成之仙箕

翁來靈筆舞龍蛇翁去瑤壇鎖暮霞舊事欲談

三百載五雲閣上望仙槎

書龍頭義約簿人鳩一千

桂菊風香造榜天門標捷懺地流錢筆端快便
行年順騎鶴纏腰身兩全

又

鴟鶚聯翩二十名看看金榜是同盟河南人面
分明見盡說龍頭識已成

鑒空閣

鑒空閣上賞僧軒祗樹森開不二門一水橫流

界平埜數峯突起補前村舟來舟去人多事潮
落潮生岸有痕鎮日長閒輸老衲倚筇獨坐古
榕根

河南掃松訪古勝寺不遇主僧

主僧走城磨驢兒廊僧閉門縮頭龜長髮行者
披鶉衣淪我苦茗行相隨禪床破筆客自展急
呼蒼頭揮大扇臥到夕陽暑力軟歸趁潮平柁
流轉

重九日游南山峽覺海寺

六
卷之十五
一
六
恰重陽日到南山小摘黃花供綠樽鐘叩一聲
蕭寺晚移舟載月過前灣

看僧披剃

爾教言無相誰教蛻髮毛虛名猶度牒多事更
方袍父認師傳的年推戒牒高冠巾何不可只
要斷塵勞

夜夢漁父求詩覺能記其全書贈梁彌仙
酒湖無盡春無限一葉江湖萬里天明月滿蓬
風荻響醉眠正在白鷗邊

卷之十五